



REPUBLIKA E KOSOVËS / REPUBLIKA KOSOVA

GJYKATA THEMELORE FERIZAJ

Numri i lëndës: 2023:305098

Datë: 17.05.2024

Numri i dokumentit: 05700652

2023:305099

NË EMËR TË POPULLIT

GJYKATA THEMELORE NË FERIZAJ- DEPARTAMENTI I PËRGJITHSHËM

PENAL – gjyqtarja e vetme gjykuese Hakile Ilazi, me pjesëmarrjen bashkëpunëtorit profesional Gent Mustafa, në çështjen penale kundër të akuzuarit I.B., për shkak të veprës penale lëndim i lehtë trupor nga neni 185 par 1 nën par 1.4 lidhur me nenin 31 të KPRK-së, sipas aktakuzës së Prokurorisë Themelore në Ferizaj PP/II nr.888/22 të datës 21.07.2023, në praninë e prokurorit të shtetit Mimoza Sylja Hyseni dhe të akuzuarit I.B., pas mbajtjes së shqyrtimit fillestar dhe publik më dt. 13.05.2024, mori dhe publikisht shpalli këtë:

A K T G J Y K I M

I akuzuari: I.B., i lindur me...në fshatin M.. - Ferizaj, me vendbanim në të njëjtin vend, nga i ati H. dhe e ëma F.. e gjinisë H.. i gjendjes së mesme ekonomike, i martuar, babai i një fëmije, ka të kryer shkollën e mesme, me profesion punëtor fizik, shqiptar, shtetase i Republikës së Kosovës me numër personal

Ë S H T Ë F A J T O R

Sepse; me 28 Janar 2020, rreth orës 00:20, në fshatin ..., Komuna Ferizaj, saktësisht në një lokal në bashkëkryerje edhe me të pandehurit A.B. dhe L.B., i'u kanë shkaktuar lëndime trupore të dëmtuarve D.B. dhe V.B., në atë mënyrë që derisa ishin duke filluar lojën e bilardos, fillimisht i pandehuri A.. e ofendon me fjalë të dëmtuarin D,.. dhe menjëherë e sulmon fizikisht duke e goditur shqelma, ofrohet i dëmtuari V.. për ti ndarë, në këto momente ofrohen të pandehurit LB. dhe I.B. dhe që të tre i sulmojnë fizikisht të dëmtuarit D.. dhe V.. duke i goditur me grushta dhe shqelma në pjesë të ndryshme të trupit, me ç'rast i'u kanë shkaktuar dëmtime të lehta trupore me dëmtim të përkohshëm të shëndetit të përshkruara si në akt ekspertimin mjeko ligjor e datës 12 Mars 2023;

me të cilën në bashkëkryerje kanë kryer e veprën penale Lëndimi i lehtë trupor nga neni 185 par 1 nenpar.1.4 lidhur me nenin 31 të KPRK-së,

Andaj, gjykata në bazë të neneve 4, 7, 17, 21, 38, 39, 40, 43, 46, 47, 48, 49, 53, 69 dhe 70 të KPRK-së si dhe nenit 360, 361, 364 dhe 457 të KPPK-së, të akuzuarin e,

G J Y K O N

Me dënim me burgim në kohëzgjatje prej tre (3) muajve, i cili dënim nuk do të ekzekutohet nëse i akuzuari brenda periudhës kohore prej një (1) viti pas plotfuqishmërisë së këtij aktgjykimi, nuk kryen vepër tjetër penale, në të kundërtën dënimi me kusht do të revokohet.

Të dëmtuarit D.B. dhe V.B. që të dy nga fshati M.. – Komuna Ferizaj, për realizimin e kërkesës pasurore juridike, udhëzohen në kontest civil.

Obligohet i pandehuri që në emër të shpenzimeve të paushallit gjyqësor të paguajë shumën prej njëzetë (20) euro, për kompensimin e viktimave të krimit të paguajë shumën prej njëzetë (20) euro si brenda afatit prej tridhjetë (30) ditëve pas plotfuqishmërisë së këtij aktgjykimi, nën kërcënimin e përmbarimit të dhunshëm.

A r s y e t i m i

Prokuroria Themelore në Ferizaj me aktakuzën PP/II nr..../22 të datës 21.07.2023 e ka ngarkuar të akuzuarin I.B., për shkak të veprës penale lëndimi i lehtë trupor nga neni 185 par 1 nenpar.1.4 lidhur me nenin 31 të KPRK-së.

Gjykata duke vepruar sipas kësaj çështje penale mbajti shqyrtimin fillestar më dt13.05.2024 në të cilin shqyrtim ishin të pranishëm prokurori i shtetit Mimoza Syla Hyseni dhe i akuzuari I.B..

Pasi që gjykata e ka udhëzuar të akuzuarin në kuptim të nenit 241 par.1 të KPPK-së dhe pasi që i pandehuri ka deklaruar se i ka kuptuar në tërësi udhëzimet e dhëna nga gjykata, në pajtim me nenin 241 par.3 të KPPK-së shqyrtimi fillestar ka vazhduar me leximin e aktakuzës nga ana e prokurorit të shtetit dhe pasi që gjykata është bindur se i akuzuari e ka kuptuar në tërësi aktakuzën, duke vepruar sipas nenit 241 par. 4 të KPPK-së i ka ofruar mundësinë që të deklarohet lidhur me fajësinë apo pafajësinë për veprën penale për të cilën është akuzuar.

I akuzuari I.B. ka deklaruar se e pranon fajësinë për veprën penale që e ngarkon aktakuza, se pranimin e fajësisë e bënë në mënyrë vullnetare dhe se është i vetëdijshëm për pasojat që mund të vijnë si rezultat i pranimit të fajësisë, është penduar thellë, i kërkon falje të dëmtuarve, duke theksuar se rasti që ka ndodhur ka qenë i rastësishëm dhe nuk ka pasur për qëllim që ti lëndoj të dëmtuarit, është hera e parë që ka ra ndesh me ligjin, i ka premtuar gjykatës se nuk do të përsërisë vepra të tilla penale si dhe e ka lutur gjykatën që të merr parasysh rrethanat lehtësuese dhe ti shqiptoj një dënim sa më të butë.

Prokurori i shtetit Mimoza Syla lidhur me pranimin e fajësisë nga ana e të akuzuarit ka deklaruar se pajtohet me pranimin e fajësisë nga i pandehuri, pranimi i fajësisë është bërë në mënyrë vullnetare, i pandehuri e ka kuptuar natyrën dhe pasojat e pranimit të fajësisë dhe ky pranim i fajësisë mbështetet në faktet e çështjes që përmban aktakuza andaj i ka propozuar gjykatës që ta marrë parasysh pranimin e fajësisë nga i akuzuari.

Meqë i akuzuari e ka pranuar fajësinë, gjyqtarja e vetme gjykyese ka konstatuar se janë plotësuar të gjitha kërkesat e përcaktuara me dispozitën e nenit 242 par.2 të KPPK-së, i pandehuri ka kuptuar natyrën dhe pasojat e pranimit të fajit, pranimi është bërë vullnetarisht, pranimi i fajit mbështetet në faktet e çështjes që përmban aktakuza, në materialet e prezantuara nga prokurori i shtetit, dhe në provat materiale të cilat gjenden në shkresat e lëndës siç janë: raporti fillestar i incidentit, raportet mjekësore si dhe Akt Ekspertimi Mjeko ligjor dt.12.03.2023 si dhe foto dokumentacioni dhe shkresa tjera që gjenden në lëndë.

Meqenëse, i akuzuari e ka pranuar fajësinë e cila është në përputhje me kriteret e përshkruara më lartë, gjyqtarja e vetme gjykyese konform nenit 242 par.6 të KPPK-së, ka vlerësuar se nuk është e nevojshme vërtetimi i ndonjë fakti relevant për shqiptimin e dënimit dhe për këtë arsye ka vazhduar me shqiptimin e dënimit.

Vlerësuar nga aspekti juridik gjykata gjeti se në veprimet e të pandehurit ekzistojnë të gjitha tiparet objektive dhe subjektive të figurës së veprës penale lëndim i lehtë trupor nga neni 185 par 1 nën par 1.4 lidhur me nenin 31 të KPRK-së, ashtu siç është theksuar në dispozitiv të këtij aktgjykimi, te përshkruar në datën, vendin, kohën dhe mënyrën apo rrethanat e kryerjes.

Me rastin e matjes së llojit dhe lartësisë së dënimit gjykata vlerësoi të gjitha rrethanat në kuptim të nenit 69 dhe 70 të KPRK-së, dhe gjeti si rrethanë veçanërisht lehtësuese se në shqyrtimin fillestar i pandehuri e ka pranuar fajësinë, duke e shprehur pendimin e sinqertë dhe real për veprën penale të kryer, është mbajtës i familjes, konkretisht baba i një fëmije, ndërsa në rastin

konkret nuk gjeti ndonjë rrethanë rënduese përveç që vlerësoi shkallën e përgjegjësisë penale të pandehurit dhe me rastin e vlerësimi të rrethanave rënduese gjykata mori parasysh peshën e veprës penale për të cilën është akuzuar.

Andaj duke marrë parasysh tërësinë e këtyre rrethanave, të pandehurit i shqiptoi dënim si në dispozitiv të këtij aktgjykimi, me bindjen se në rastin konkret do të arrihet qëllimi i dënimit në kuptim të preventivës speciale dhe asaj gjenerale, ku një dënim i tillë është adekuat dhe në proporcion të drejtë në raport me peshën e veprës penale, rrethanave të kryerjes së veprës penale, shkallën e përgjegjësisë penale dhe personalitetin e të pandehurit.

Gjykata të dëmtuarit i ka udhëzuar në kontest civil për realizimin e kërkesës pasurore juridike konform nenit 457 të KPPRK-së.

Vendimi mbi shpenzimet paushallë dhe për ekspertizën mjekoligjore është marrë në kuptim të dispozitës së nenit 452 paragrafi 1 lidhur me nenin 449 paragrafi 1 dhe 2 nën paragrafi 2.6 të KPPRK-së.

Vendimi mbi Kompensimin e Viktimave të Krimit është marrë në kuptim të nenit 36 paragrafi 3 nën paragrafi 3.1 të Ligjit Nr.08/L-109 për Kompensimin e Viktimave të Krimit.

Në bazë të së theksuarës më lartë u vendos si në dispozitiv të këtij aktgjykimi.

GJYKATA THEMELORE NË FERIZAJ
DEPARTAMENTI I PËRGJITHSHËM
2023:163996, me dt. 13.05.2024

Bashkëpunëtor Profesional

Gent Mustafa

Gjyqtarja e vetme gjykuese

Hakile Ilazi

KËSHILLA JURIDIKE: Kundër këtij aktgjykimi është e lejuar ankesa, Gjykatës së Apelit në Prishtinë në afat prej 30 ditësh nga dita e pranimit të kopjes me shkrim të këtij aktgjykimi. Ankesa duhet të dorëzohet në Gjykatën Themelore në Ferizaj.